

**Govor zamjenika predsjedavajućeg Predstavničkog doma Parlamentarne skupštine Bosne i Hercegovine dr. Denisa Zvizdića na Regionalnoj konferenciji predstavnika parlamenata i novinarskih udruženja iz četiri države Zapadnog Balkana - Bosne i Hercegovine, Srbije, Crne Gore i Sjeverne Makedonije**

**Sarajevo, 21. oktobar 2022.**

“Poštovani i dragi gosti,

Zaista mi je velika čast što sam danas ovdje s vama na regionalnoj konferenciji o temi “Unapređenje dijaloga između parlamenata i novinara Zapadnog Balkana“ koju organizuje Udruženje novinara Bosne i Hercegovine u saradnji sa Parlamentom Bosne i Hercegovine.

U vremenu u kojem živimo, govoriti o dijalogu između poslanika nacionalnih parlamenata i udruženja novinara zemalja Zapadnog Balkana u cilju poboljšanja slobode izražavanja kao osnovnog ljudskog prava predstavlja korak dalje u jačanju saradnje sa novinarima i put ka cilju svakog profesionalnog novinara, a to je blagovremeno, nepristrasno i objektivno izvještavanje javnosti.

Mediji i novinari koji rade u medijima moraju biti slobodni, kako bi ispravno informirali javnost. Mi, parlamentarci smo vaš servis i samo zajedno, sa istim ciljem ćemo biti u službi svih građana.

Danas se ne želim obazirati na novinare koji rade za interese određene političke opcije i koji su dio političke propagande. Iako treba naglasiti da sloboda govora nije apsolutno ljudsko pravo. Ono u Evropskoj konvenciji ima vrlo važno ograničenje, a to je da ne možete koristiti slobodu govora da širite govor mržnje i etiketirate ljude i vrijeđate njihov ugled i dostojanstvo. Evropski sud je u tom smislu zauzeo jasne stavove. Sloboda govora ne znači slobodu govora mržnje. Lično sam kao zastupnik predlagao zakone i inicijative u cilju zabrane govora mržnje kako u javnom prostoru tako i na internetu, odnosno društvenim mrežama, i nastavit ću istim putem i u mandatu koji slijedi. Želim prioritarno da se obratim vama, profesionalcima koji ste i ovom konferencijom

pokazali da hoćete i želite da poboljšate zakonodavni okvir u ovoj oblasti i s moje strane ćete uvijek imati podršku.

Konferencijom u Skoplju, pa potom ovom današnjom u Sarajevu svi zajedno postavljamo nove profesionalne standarde koji će biti važni za dijalog između novinara i parlamentaraca. Važni će biti i zbog odluke Evropske komisije da Bosni i Hercegovini da status kandidata i u osam uslova su jasno istaknuli da ukoliko želimo napredovati na evropskom putu da moramo garantovati slobodu izražavanja i medija i zaštitu novinara, posebno osiguravanjem odgovarajućeg sudskog postupka u slučajevima prijetnji i nasilja nad novinarima i medijskim radnicima.

Mi u Predstavničkom domu, svjesni činjenice da novinari trebaju biti zaštićeni od fizičkog nasilja i drugih vidova ugrožavanja sigurnosti, zatražili smo da se napad na novinare u zakonu tretira kao posebno krivično djelo.

Takva inicijativa usvojena je krajem juna 2022. godine u Predstavničkom domu Parlamentarne skupštine BiH, a Vijeće ministara BiH imao rok od 60 dana da je razmotri i pošalje u parlamentarnu proceduru. Nažalost, zbog nerada ovog saziva Vijeća ministara to se još nije desilo. Mi ćemo nastaviti da radimo i da predlažemo i unapređujemo pravne regulative, posebno u oblasti govora mržnje i širenja netolerancije po nacionalnoj, religijskoj, kulturnoj, političkoj ili bilo kojoj drugoj osnovi. To nam je cilj i na tome ćemo insistirati.

Siguran sam da će naša saradnja biti kvalitetna i obostrana.

Želim vam uspjeh u radu konferencije i da uživete u našem lijepom Sarajevu.” (kraj)